



**Gemeinsam Äntwert vum Finanzminister, Gilles Roth, a vum Minister fir Ëmwelt, Klima a Biodiversitéit, Serge Wilmes, op d'parlamentaresch Fro n°1804 vum 21. Januar 2025 vum éierbaren Deputéierten Sven Clement**

1. Wéi héich waren d'Entschieedegunge vun den Assurancen zu Lëtzebuerg duerch klimabedéngt Schied an de leschten 10 Joer a wéi huet sech dëst am Verglach zu den 10 Joer virdrun entwéckelt?

D'Entschieedegunge vu klimabedéngte Schied duerch Assurancë-Gesellschafté sinn an de leschte Joren tendenziell an d'Luucht gaangen. Fir eng genau chiffréiert Analyse vun de leschten 10 Joren am Verglach zu den 10 Jore virdrun ze maachen, feelen déi entspriechend historesch Donnéeën. Als gréisser Evenementer vun de leschte Jore kann een den Tornado vum 9. August 2019 (100 Milliounen Euro) an d'Iwwerschwemmunge vum 14. a 15. Juli 2021 (135 Milliounen Euro) nennen.

2. Wéi eng Mechanismen huet de Staat aktuell fir den Assurancësecteur ze ënnerstëtzen am Fall vu gréisseren Naturkatastrophen? Gëtt et Pläng fir eng staatlech "Assurance vun der leschter Chance" anzeféieren?

An enger Etüd vun November 2024 vun der europäescher Assurance-Autoritéit (EIOPA) gouf Lëtzebuerg eng adequat Couverture vu Risiken duerch Naturkatastrophen attestéiert. Et ginn deementspriechend aktuell keng Pläng fir eng staatlech „Assurance vun der leschter Chance“.

Staatlech Entschieedegunge komplementär zu versécherter Schied goufen déi lescht Jore vu Fall zu Fall decidéiert.

3. Wéi eng konkret Mesurë gi geholl fir den Assurancësecteur méi resilient géint Klimarisiken ze maachen? Gëtt et spezifesch Ufuerderungen un d'Reserven, déi d'Assurancë musse virweisen?

D'Ufuerderungen un d'Reserven am Lëtzebuenger Assurancësecteur sinn duerch den EU-wäit applicablen „Solvency II Regime“ reglementéiert.

Klimarisiken ginn, nieft allen anere Risiken, vun den Assurancë Gesellschaften an der Berechnung vun de Egekapitalufuerderunge berücksichtegt. Déi rezent iwwerschaffte Solvency II Direktive wäert d'Ufuerderunge fir d'Gestioun vu Klimarisiken nach weider verstärken.

Zousätzlech huet de Commissariat aux Assurances (CAA) eng spezifesch „Note d'information 24/4 relative aux enjeux réglementaires liés à la finance durable“ publizéiert.

4. Gëtt et Analyse vun der Regierung iwwert déi laangfristeg Auswierkunge vum Klimawandel op den Assurancesystem zu Lëtzebuerg? Wa jo, wat sinn d'Haapterkenntnisser?

Lëtzebuenger Assurancë-Gesellschafté mussen de laangfristegen Impakt vum Klimawandel an hirem „Own Risk and Solvency Assessment“-Rapport (ORSA) analyséieren.

Den CAA huet diesbezüglich am Oktober 2023 festgestallt, dass iwwer 70% vun de Lëtzebuenger Assurancë- a Réassurancë-Gesellschaften d'Auswierkunge vum Klimawandel op hir Aktivitéite berücksichtegen.



5. Wéi eng präventiv Mesurë ginn et, fir d'Klimarisiken ze reduzéieren an domat och d'Assurancebranche ze entlaaschten? Wéi gëtt d'Zesummenaarbecht tëscht Assurancebranche, Staat a Gemengen an dësem Beräich koordinéiert?

An der nationaler Klima-Upassungsstrategie si konkret Moosname virgesinn fir d'Vulnerabilitéit vu Lëtzebuerg par rapport zu Klimarisiken ze reduzéieren. Dës Strategie huet als Zilsetzung fir d'Resilienz an alle politesche Beräicher ze stäerken. D'Klima-Upassungsstrategie ass amgaang iwwerschafft ze ginn, an ee Projet ass vum Regierungsort ugeholl ginn. De 7. Februar 2025 ass dës projet de stratégie virgestallt a verëffentlecht ginn. (<https://environnement.public.lu/fr/actualites/2025/02/approche-holistique.html>)

Aktuell sinn am projet de stratégie 131 präventiv Moosname virgesinn, an d'consultation publique soll et erméigleche fir mat allen Akteuren iwwert dës Proposen ze schwätzen a, falls noutwenneg, zousätzlech Moosnamen ze identifizéiere fir d'Resilienz vun de jeeweilege Beräicher ze stäerken. De 25. Februar 2025 hu Verrieder vum Assurancësecteur un enger Aarbechtssitzung deelgeholl déi am Kader vun der genannter consultation publique organiséiert ginn ass. Hei gouf nach eemol däitlech ënnerstrach dat de präventive Schutz wichteg ass fir d'Schied an d'Käschten ze reduzéieren. D'Zesummenaarbecht tëschent dem Staat an der Assurancebranche wäert dofir och an Zukunft weider verstärkt ginn.

Nieft der Upassung un de Klimawandel, gouf den 31. Mäerz 2021 den Héichwaasserrisikomanagementplang vum Regierungsrat ugeholl fir d'Risiko vum Héichwaasser ze reduzéieren. Fir dës Ziler ze erreechen, goufen och 263 konkret Moosname festgeluecht. Hei gëtt sech net nëmmen op d'Héichwaasser vun de gréissere Baachen a Flëss limitéiert, mä och op d'Geforen, déi vum Staarkreen kommen. Mir erlaben eis den éierbaren Deputéierte méi allgemeng op d'Äntwerten op d'parlamentaresch Fro n°1763 zum Thema „Héichwaasserschutz“ ze verweisen.

Lëtzebuerg, den 3. Mäerz 2025

De Finanzminister

(s.) Gilles Roth